

Naqqiut

Saqqummiussissut 9. august 2023-imeersoq taarserpaa
(Naalakkersuisup taaguutaata allanngortinneqarnera suliarineqarpoq)

Kalaallit Nunaanni eqqartuussisarnermik inatsisip allanngortinneqarnera pillugu inatsisissatut siunnersuutip (Inatsisit unioqqutinneqarneranni pinerluttoqarsimaneranik paasiniaanermut ilaattilugu politiit inunnik sunniiniartartunik atuineraat il.il.) Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut

(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Saqqummiussissut

(Inuutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Kalaallit Nunaanni Politiit inatsisinik unioqqutitsisoqarneranik paasiniaanerisa patajaallisaavigineqarnissaat siunertalarugu inatsisissatut siunnersuut manna saqqummiunneqarpoq, matumi inunnik sunniiniartartunik atuinikkut ikiaroornartut pillugit pinerluttuliornerit, aaqqissuussaasumik pinerluttuliornerit aamma internettikkut pinerluttuliornerit pillugit pinerluttoqarsimaneranik paasiniaanerit ilangullugit.

Taamaammat inatsisissatut siunnersuut inatsisit atuutsinneqarnerannut suliassaqarfip nutarterneqarnissaa pillugu suliaqarnermut ilaaginnarpoq, taamaalilluni suliassaqarfik sunniuteqarluartuuniassammat ullumikkumullu naleqquttunngorniassammat.

Sunniiniarneq periaatsit assigiinngitsut atorlugit pisinnaavoq, kisianni inunnik sunniiniartartunik atuinermi piumasaqaatit arallit naammassineqarnissaat tamatigut piumasaqaataavoq, piumasaqaatillu taakku eqqartuussivimmit akuerineqaqqaartussaapput.

Inuup allap pinerluttuliornermik iliuuseqarneranik politiit arlaatigut eqeersimaartumik ilaanerat, sunniiniarnerup kinguneraa.

Malittarisassat atuuttut malillugit politiit pinerluttoqarsimaneranik paasiniaanermi iliuutsinik, sunniiniartarneq pillugu malittarisassani ilaasussaanngitsunik, suliaqarsinnaareerput. Tassunga assersuut tassaasinnaavoq pisumi politeeq uniformeqanngitsoq aqqusinermi ikiaroornartumik neqeroorfingeqartoq neqeroorummullu qujasoq. Uani politiit tungaanniit kajumissaarisoqanngilaq. Ikiaroornartunik tuniniaasup pinngitsoorani ikiaroornartoq tunisimassavaa imaluunniit tuniniarsarisimassallugu. Pisumi taamaattumi eqqartuussiviit akuliunneqarnissaat piumasaqaataanngilaq.

Politiit akuliutinneqannginnerannut naleqqiullugu, sunniiniartarnerup inatsimmik unioqqutitsinerup annertusineqarnissaanik imaluunniit ingasannerulernissaanik kinguneqartumik politiit iliuuseqassangillat. Assersuutigalugu tuniniaasup pissarsiarereersimasaanik annerusumik politiit pisiniarlutik neqerooruteqarsinnaannginnerat tamatuma kinguneraa, tassani tuniniaasup nioqqtissanik pissarsiassamisut tuniniagassamisullu eqqarsaatigisani sinnerlugit tuniniagassaminik pissiarsiniartariaqalinnginnissaa tassunga pissutaavoq.

Pinerluttuliornerup akiorniarneqarnera politiit taamaallaat siunertarisarivaat, aamma taamaammat pinerluttuliornernik ingasannerusunik kajumissaarisussaanatik. Inuit sanngiitsut pinerluttulioqqullugit, imaluunniit taakku pinerluttuliornernik ingasannerusunik suliaqaqqullugit politiit ussissanngilaat.

Sunniiniarnermut assersuutit ilagisinnaavaat, politiit namminneq suliniuteqareernertermikkut tuniniaasumut saaffiginninnerat aamma ikiaroornartumik immikkoortitamik, tuniniaasup pissarsiarereersimasaanik pisiniarlutik qinnutiginninnerat. Malittarisassat maannakkut atuuttut aamma malittarisassat nutaat assigiinngissutigaat inuup sunniiniartup inatsimmik unioqqutitsinermi ima peqataasimanissaa, iliuuserisaa nalinginnaasumik pinerluttuliornermut peqataasutut isigneqarsinnaassalluni, aamma pissutsit nalinginnaasut ataanni pinerluutinngortinnejarsimassalluni.

Taamaalilluni aalajangersakkat ilanngunneqarnerisigut, pinerluttoqarsimaneranik paasinianerminni pinerluttuliornerillu paasinarsisinneqarneranni, ingammik silarsuarmi digitaliusumi massakkut najukkatsinni, sakussanik amerlanerusunik Kalaallit Nunaanni Politiit tunineqassapput.

Taamatut oqaaseqarlutik immikkoortup Inatsisartuni suliarineqarnissaanut Naalakkersuisut tunniuppaat.